

Ў З Б Е К И С Т О Н С С Р «Б И Л И М» Ж А М И Я Т И

Ҳ. ЁҚУБОВ

ОЙБЕК



**«ЎЗБЕКИСТОН» НАШРИЁТИ
Тошкент — 1975**

Ёқубов X.

Ойбек. (Ҳаёти ва ижоди ҳақида). Т., «Ўзбекистон», 1975.
24 б.

Китобчада буюк ўзбек шоири ва ёзувчиси Ойбек шеърия-
ти ва прозаик асарлари ҳақида сўз юритилади. Муаллиф
адибнинг ўзбек адабиёти ривожига қўшган улкан ҳиссасини
унинг асарларини таҳлил қилиш орқали очиб беришга ҳара-
кат қиласди. Китобча ўқувчиларга манзур бўлар деган умид-
дамиз.

Якубов X. Айбек.

8Уз2

На узбекском языке

Хамил Якубов

АЙБЕК

Издательство «Узбекистан» — 1975 — Ташкент ул. Навои, 30.

Отпечатано в типографии изд-ва ЦК КП Узбекистана,
Ташкент, «Правда Востока», 26.

Редактор Б. Шарипов

Техредактор В. Демченко

Корректор А. Хакимжонова

Теришга берилди 16/V-1975 й. Босишига ружсат этилди 3/IX-1975 й.
Қоғоз формати 84×108½, № 2. Бос. л. 0,75. Шартли бос. л. 1,26.
Нашр. л. 1,24. Тиражи 14868. Р—10843. «Ўзбекистон» нашриёти,
Ташкент, Навоий, 30. Шартнома № 198-75.

Ўзбекистон КП Марказий Комитети нашриётининг босмахонаси,
Ташкент, «Правда Востока» кўчаси, 26. Заказ № 3029. Баҳоси 6 т.

© «ЎЗБЕКИСТОН» нашриёти, 1975 й.

Е 70203 314
М 351 (06) 75 105—75

Буюк ўзбек ёзувчиси Ойбекнинг мураккаб ва зангин ижодий олами, олмос қиррали образлари ўзигагина хос, тақрорланмас адабий ҳодисадир. Ҳақиқатан ҳам, устоз ўзбек халқ шоириFaфур Fулом таъкидлаганидек, «Ойбекнинг серҳосил, ўтқир ижодкорлигини бизнинг адабиёт тарихида кимга ўхшатиш мумкин? Ойбекни ўзига, Ойбекка ўхшатиш мумкин». Айни замонда Ойбекнинг ҳеч кимниги ўхшамайдиган ижодиёти қонуний тарихий процессни акс эттириди.

Ойбек ўзбек совет адабиётининг биринчи авлодига мансуб бўлган, деярли ўзига тенгқур Faфур Fулом, Fайратий, Уйғун, Ҳамид Олимжон ва шу каби ёзувчилар қаторида Ҳамза Ҳакимзода бошлаб берган янги реалистик ижод усулини танлаб олди ва ривожлантириди. Бу ҳақда кейинчалик у шуларни ёзган эди: «Совет шоирлари... ўзбек совет адабиётининг асосчиси Ҳамза Ҳакимзода ва баъзи шоирлар томонидан поэзиянинг ҳамма жанрларида тажрибадан ўтказилган фольклордаги халқ қўшиқлари — эпос — «бармоқ» вазнида ёза бошладилар. Мен ҳам бармоқ вазнида ёза бошладим». Бу ўринда гап янги мазмунни ўзига монанд халқчил формада ифодалаш тўғрисида бораётган бўлса-да, Ҳамза Ҳакимзодадан ўрганиш тобора чуқурлашади, янги ижод типини, образлар яратиш усулини излаш масалаларига кўчади. Зотан, бой классик адабиётимиз, халқ оғзаки поэтик ижодиёти, қардош халқлар адабий тажрибаларини ижодий ўзлаштирган шоир ва драматург Ҳамза Ҳакимзода ўзбек совет адабиётида янги бадиий метод принципларига ҳам асос солди. Ҳамза Ҳакимзода бадиий ижоднинг ғоявий-эстетик асосларини, реализм принципларини умумсовет адабиёти бадиий методи — социалистик реализм методи изига солиб юборди. Унинг ижодиётининг бу новаторлик хусусияти Ойбек ва унинг

замондошлари ижодида ўзига хос равиша ўзлаштирила ва ривожлантирила борилди. Бу жараёнда улуғ рус ва СССР халқларининг бу соҳадаги бой тажрибаларидан ижодий ўрганиш, ўзаро адабий алоқаларнинг кенгайиши ва чуқурлашиши ҳам катта аҳамият касб этди.

Ойбек жозибали, жўшқин фикр ва ҳисларга бой шеърлари, достонлари, қиссалари, романлари, чуқур назарий ва амалий қимматга молик илмий ва публицистик мақолалари билан умумсовет адабиёти хазинасига салмоқли ҳисса қўшди.

Мусо Тошмуҳаммад ўғли — бўлғуси ёзувчи Ойбек бўронли биринчи рус революциясининг бошланиш йилида, ишчи синфи ва бутун меҳнаткаш қатламлар чоризм салтанастига ҳамда помешчиклар тузумига қарши бепоён мамлакатимиз бўйлаб узил-кесил оёқقا турган пайтда, 1905 йилнинг 10 январида Тошкентда ҳунарманд-бўзчи оиласида дунёга келди. У ўз ота-онаси ҳақида кейинчалик шундай маълумот берди: «Отам ёшлигида бўзчи, кейин Хумсон ва Янгибозор қишлоқларида боққоллик қилган. Ўқимаган, жаҳли тез, тажанг бир одам эди. Онам жисмоний жиҳатдан кучсиз, лекин ақлли, зийрак, раҳмдил ва ҳар ишга эпчил хотин эди. Дўппи-жияк ва қўл ишлари билан кўп машғул бўларди. Ишдан бўшагач, кўп китоб ўқирди».

Мана шу меҳнаткаш ва заҳматкаш она тарбияси ва таъсирида ўсган ёш Мусо онасининг айтган қўшиқлари ва ўқиган китобларини ҳавас билан тинглар эди. Мусо етти ёшга етганда қари бобоси уни эски усуздаги мактабга олиб бориб берди ва одат бўйича:

«Исми Муҳаммад Мусо,
Тақсир, эти сизники,
Устухони бизники»—

деб набирасини «катта саллали, кичик бошли» домланинг ихтиёрига топширди. Мусо «Қоронғи, ис босган, захкаш» бир уйда жойлашган эски мактабда мўйлаблари сабза урган ва гўдак, бирмунча саводхон ва ғирт саводсиз болаларга аралашиб ўқиди. Эски мактаб ҳаёти Мусо учун оғир кечди. Чунки у ердаги таълим, савод чиқариш болаларни уриш-калтаклаш, домланинг тирикчилиги учун овқат ва пул йиғиши йўли билан амалга оширилар эди. Мактабнинг «пайшанбалик», «ийдлик» («ҳайитлик»), бўйра пули, қамчи пули, таълим пули, «озодлик» каби маросимлари шу мақсадда жорий қилинган эди.

Мусо (Ойбек) эски усуздаги мактабнинг оғир шароитида 13 ёшига қадар ўқиб, тиришқоқлиги туфайли саводини

чиқара олди, классик адабиётининг баъзи намуналарини ўқий билиш даражасига етди. Шу равишда поэтик ижод болаликдан Мусонинг қалбидан жой ола бошлади. Болалик пайтларидаёқ Мусони оддий кишилар айтиб берган қўшиқ ва ашулалар, эртак ва масаллар, «Минг бир кеча» ҳикоялари, лапар ва қозоқ ўланлари, халқ қизиқчилиги ва асқиялар, мақол ва ҳикматли сўзлар жуда қизиқтирган. Опасининг ҳали саводи чиқмаган укаси Мусога ёддан ва китоблардан «Навоий, Машраб, Ҳофизларни майин, ёқимили овоз билан, чиройли оҳанг бериб, жуда равон ўқиши» уни мафтун этган. Бобоси юракдан чиқариб айтган жозибали, романтик руҳдаги ҳикоя ва ривоятларни завқ билан тинглаган. Бундай ҳаяжонли онларда ўзини худди мурғак ақли тўлишаётгандек, туйғулари бойиётгандек сезган. Ора-чўра эшитган ва билганларини қўшиб-чатиб, ўзича ашула ҳам тўқиган, Эски усулдаги мактабда саводи чиққандан кейин Ҳофиз, Навоий, Фузулий, Бедил, Машраб, Муқимий ва бошқаларнинг шеърларини ўқиш унга кучли завқу шавқ бағишилаган. Айниқса, Навоий ғазалиёти Мусо тасаввурида бир умр сақланиб қолган. «Ҳақиқатан,— деб ёзади у «Болалик» хотираларида,— Навоий менда пок севги яратди. Унинг шеърларини завқ билан, чуқур ҳис билан ўқийман. Пок муҳаббатини, чуқур маънони, ёқимли ҳисни илк дафъа Навоийдан ўрганганман». Халқ ҳаётининг баланд-паст тўлқинлари, аччиқ-чучук ҳодисалари, ёзма ва оғзаки поэтик ижод дунёси, она диёр табиатининг гўзаликлари таассуроти ажойиб суратда бирикиб, ёш Мусонинг онг ва ҳисларини шакллантира боради.

Ойбек 12 ёшида Улуғ Октябрь социалистик революциясини қарши олди ва янги очилган совет мактабларидан бирига кириб ўқиш, 1921 йилдан бошлаб эса, Навоий номидаги биринчи ўзбек таълим-тарбия техникумida билим олиш баҳтига мұяссар бўлди. У техникумда тўрт йил таҳсил олди, унинг интернати бағрида тарбияланди, Ленин комсомоли сафиға кирди. Техникум ўқувчиларининг «Тонг юлдузи» деган деворий газетасида мұҳаррирлик вазифасини ҳам бажарди. Ойбек таҳаллуси билан шеърлар ёзиб, талабалар орасида танилди. «Чолғу товуши» номли биринчи шеъри матбуотда 1922 йилда «Армуғон» деган адабий тўпламда эълон қилинди. Ёш шоир улуғ Ленин вафоти муносабати билан ёзилган «Йўқлаш», «Йўқсуллар сўзи», «Ўзгариш тўлқинлари», «Байроқ», «Ишчига», «Ёш куч», «Ёш куч толмасин», «Ер кимники» каби машқ шеърларидаёқ ёш, қайноқ қалбига янги замон бахш этган

янгича фикр ва ҳисларни ифодалади, комсомол ва совет ёшларининг инқилобий ҳодисаларга қарашини, жанговарлик руҳини акс эттиради. Айни чоқда унинг айрим машқларида тез таъсиранувчи ҳассос қалбнинг ўта раҳмдиллиги ҳам сезилиб туради. Овчиларнинг қуш отишидан, болаларнинг қўнғиз тутишидан, парранда ва ўсимликларга озор беришидан шоир дили қаттиқ оғрийди, ўзбек қизларининг зўрлаб турмушга чиқарилишидан, муҳаббатнинг вафосизлигидан, табиат ва турмушнинг нохуш манзараларидан ўқсиб йиғлагиси келади, қалби яралангандай бўлади. Лекин тобора ҳодисаларнинг ҳаётбахш истиқболига ишонч руҳи ортади, ижодий концепцияси, дунёни кўриши ва позицияси аниқланади.

Ойбек 1925—1930 йилларда Урта Осиё Давлат университети ижтимоий фанлар факультетининг иқтисод бўлимida, Ленинград Халқ хўжалиги институтida таҳсил олди. У марксизм-ленинизм назариясини, диалектик материализмни, марксизм классиклари асарларини чуқур ўрганар, айни замонда, рус ва жаҳон адабиётининг энг яхши на муналари билан танишиб борадр эди. Шу йиллар орасида Ойбекнинг «Туйғулар» (1926), «Қўнгил найлари» (1928), сал кейинроқ «Машъала» (1931) деган шеър тўпламлари босилиб чиқди. Бу тўпламларга кирган шеърлар ёш шоирнинг гоҳо йўлда қоқилиб-туртиниб бўлса ҳам тинимсиз олға ҳаракат қилаётганлигини, қуёш нурига қараб интилаётганлигини кўрсатар эди. 1925 йилда Ўзбекистонда ерсув ислоҳоти ўтказилиши муносабати билан Ойбек «Еркимники» шеърини ёзди. Унда «олтин тупроқ» меҳнат эгасига тортиқ қилинганини шавқ билан олқишлийди, дехқон меҳнатини янчиб келган «бойқушлар»ни лаънатлайди. Ойбек эскилилка қарши янгиликнинг ҳужумини ва социалистик ҳаёт муваффақиятларини куйлади, замонамизнинг бунёдкорлик қудратини чуқур ҳис қилиб, ўзинга хос овоз ва услубда ўзбек поэзиясига янги мавзу ва янги қурувчи инсоннинг лирик образини олиб кирди. 20-йиллар охири ва 30-йиллар бошида кескин синфий курашнинг амалий оқибатлари, янгиликнинг эскилилк устидан тобора ғалаба қозониб, ўз социалистик мазмунини конкрет шаклларда мужассамлантириши шоирнинг янги ҳаёт учун кураш гўзллигини терап ҳис қилишига, турмушга соғлом, оптимистик қарашини ўстиришга йўл очди. Бу тенденция аввало «Синглумга хат», «Ўзбекистон учун», «Нева хотиралари» шеърларида ўз ифодасини топди. «Товушим» шеърида (1927) Ойбек ўз тақдирини пролетариат ва меҳнаткаш халқ тақдирни билан маҳкам боялаганлигини тараним

этди, синфий курашда ўз ўрнини қатъий белгилаганини куйлади:

Курашади икки тўлқин,
Қараб турайми?
Ёш тарихнинг темир кўлин —
Кетга бурайми?
Йўқ... болғалар, ўроқ сафи
ила бораман.
Ёнғин, кураш, жанглар сари
кўкрак очаман.
Буюк Маркс «Капитал»и
ёш юрагимда,
Янги ҳаёт, эрк диёри
икки кўксимда.

Мамлакатимизда социализм узил-кесил ғалаба қозонган йилларда шоирнинг бу эстетик сўроқлари ва «онги» ўз бадиий «жавоби» ва ифодасини топди, унинг қалби ва зеҳни орқали кечган интеллектуал-психологик кечинмалар образида конкрет гавдалантирилди.

Ойбек лирик шоир эди. У биринчи беш йиллик даврида Ғафур Ғулом, Ҳамид Олимжон, Уйғун ва бошқа забардаст шоирлар қаторида замонамизнинг қурилиш ва бунёдкорлик қудратини чуқур ҳис қилиб, улуғ рус адабиётининг баракали таъсиридан илҳомланиб ўзбек совет шеъриятига янги мавзу — озод меҳнат, билимни эгаллаш, аёллар озодлиги, мамлакатни индустрлаш, қишлоғларни колхозлаштириш каби мавзуларни ва бунёдкор инсон образини олиб киришда қатнашди. Бу мавзулар «Машъала» тўпламидаги «Фанга юриш», «Қишлоқ қизи — студент» «Муаллима», «Комсомол қўшиғи», «Еш йиллик план», «Паттачи хотин», «Комсомолка — ишли қизга», «Днепрострой», «Темир ҳақида» каби шеърларда ўз аксини топди. Бу шеърларда Ойбек инқилоб туфайли одамларда ҳосил бўлган янги кечинмаларни, совет кишиларининг меҳнат қаҳрамонлигини, озод ҳаёт нашъасини тараннум этди. Ўзбекистоннинг ўн йиллигига бағишиланган «Ўзбекистон» шеърида республикамиздаги социалистик тараққиётни кўтаринки руҳда бадиий тасвирлади:

Бир ўлқаки, тупроғида олтин гуллайди,
Бир ўлқаки, қишлоғида шивирлар баҳор.
Бир ўлқаки, сал кўрмаса, қуёш соғинар,
Бир ўлқаки, ғайратидан асаби чақнар.
Бахт тошини чақиб, бунда куч гувиллайди.

Замонавийлик туйғусини қабартиб ифодалаш, замон ҳаракатини ичдан ва кескин ҳис қилиш Ойбек лирикасини характерлайдиган энг муҳим фазилатларидан биридир. Худди қатрада қуёш акс этганидек, унинг лирик образлари

тўқимасида, ички ҳаракатида замонамиз (ёки тарихий тараққиётнинг бирор босқичи) нинг қандайдир муҳим хусусияти, қирраси, жараёни ўз бадний ифодасини топади. Ҳатто шоирнинг лаҳзалик, оний туйғулари ва ўйларини ифодалаган лирик парчаларга ҳам улуғ замон, Октябрь инқилоби, совет даврининг етакчи белгилари (қуёш, баҳор, дарё ва ҳоказо образларда) кириб-келади ва тарихий боғланишининг маълум қирралари очилади.

Тарихларнинг тун оғушини
Ёриб қуёш туғди инсонга.
Инсонларнинг қадим тушини
У кўрсатди рўй-рост жаҳонга

Лирик кечинима, эстетик ҳукм совет замонининг муҳим ижтимоий гуманистик хислатини, белгисини акс эттиради. Революция ўтмишда очлик ва қашшоқликка маҳкум этилган меҳнат аҳлиниң букчайган белини ростлади, унга қайтадан ёшлиқ баҳш этди:

Кўзлардадур ёшлиқ учқуни,
Хўп ростлаган қаддини инсон.
Мұхтожликтининг золим қуюни
Қимас энди уни саргардон.

Ойбек лирикасида ижодий меҳнатнинг гўзаллигини, инқилобнинг қудрати, совет ватанпарварлигининг ҳаётбахшилигини ифодаловчи ўзига хос образлар яратилди. Булар ичида қуёш ва баҳор образлари («Қуёш қўшиғи») шоирнинг гражданлик ва ватанпарварлик кечинмаларини куйлашга айниқса монанд-бўлиб тушди.

Қуёш ва баҳор образлари Ойбек лирикасида ривожланаб борди. Шуниси мароқлики, шоир ўзбек халқининг инқилобдан аввалги ҳаётини тасвирлаганди, қуёшни ғамгин, қовоғи солинган, ёки кичик учқун ҳолида, баҳорни эса ҳатто кишини қалтиратувчи қиши ҳолида кўради. Шуниси борки, қуёш, баҳор илиқлиги зулмат, қоронғилик ва совуқнинг кучини енгиши (нурли истиқбол сари ҳаракат) ҳамиша таъкидланади: «Қуёш инсонга тарихларнинг тун оғушини ёриб туғади». «Қуёш қўшиғи» шеърида (1937) қуёш образи билан ҳаётни ўйғотиб юборадиган баҳор образи айниқса яққол кўзга ташланади:

Ҳаётнинг кар, ҳасис тошига
Югурди бир сўлим, ёш баҳор.
Муз эриди сувнинг бошида
Ҳаёт кўрди нур тошқин диёр.

Шоир тасаввурида қуёш ва баҳор образлари Улуғ Октябрь инқилоби самаралари билан ёнма-ён, чатишган ҳолда келади ва меҳнаткаш халқа баҳт нурларини сочади:

Қуёш, нуринг тўқабер мўл-мўл!
Баҳор, кетма бизнинг бошлардан.
Юртимизда қолмасин дашт-чўл
Чаман кулсин ҳатто тошлардан.

Еки:

Ярқирай бер қуёш — инқилоб!
Бошла янги баҳорларга йўл
Дунёларга қиласман хитоб:
Абадий баҳт берди бизга қўл!

Шундай қилиб, «қуёш — инқилоб бизга абадий баҳт берди», «баҳту, қучоқ-қучоқ гул берди», «борлиқни лиммолим нурга чўмилтириди». Шоир ўтмишда «элни қуёшдан маҳрум этганлар»ни лаънатлади. Халқининг энг яхши фарзандлари нурга интилиб келганлигини самимий куйлади, совет кишининг баҳти, иқболи ҳам шоир қалбида, тасаввурида қадрдан қуёш ва баҳор образларини жонлантиради. Май байрами — «гул байрами», «қуёш байрами»дай, «қуёш машъаласини кўтарган байрам»дай гавдаланади. Май байрамига доимо «кўклам таклиф этилади», «совет халқининг кучи, маҳорати ҳамиша бу байрамга «ишнинг сепини ёйиб» келади. Шоир баҳтли турмушимизни, «юрг баҳори — офтобини» бизга «партия даҳоси баҳш этгани»дан, партия «кўкка янги қуёшлар осиб, жаҳон кечасини нурлантираётгани»дан дарак беради. У баҳтиёр совет кишиларининг «кўзларида қуёш» кўради. В. И. Ленин даҳоси «минг қуёшдан нурли» эканини таъкидлайди, доҳийнинг айрим фазилатларини қуёш ва баҳорнинг баъзи хусусиятлари билан чоғишириб, ёрқин образ яратади. Доҳийнинг «қуёш каби, гул баҳор каби табассуми»да меҳнаткашларга бўлган севгисини ифодалайди. Улуғ рус халқи ва бутун башарият ақл-заковатининг тимсол—мужассами Лениннинг боши «янги тарихнинг боши» билан жуда алоқадордир.

...Бу бош — янги тарихнинг боши,
Тунни ёқсан унинг зиёси!
Ленин — бу ном жаҳоннинг шони.
Тарихга куч ва янги нафас —
Ҳам ҳаётнинг улуғ қуёши.
Қуёш тинмас, нури ҳам тинмас.

Ленин «тун билмаган қуёш»дир, Ленин —

Исми баҳор сингари келди,
Кўк титратган қалдироқларда.
Халқ уйига кирди қуёшдай,
Шуълалари ол шафақларда.

Шоир Лениннинг «қуёшдай халқ уйига кириши»да унинг иши ва ғояларининг барҳаётлигини акс эттиради.

Ойбек шеърларининг лирик қаҳрамони революционн ва социалистик ўзгаришлар бунёдкори бўлган совет кишисининг маънавий-ахлоқий ва интеллектуал дунёсининг бойиб, гўзаллашиб боришни ўз қалб ҳарорати билан жўшқин ифодалаб берди.

* * *

30-йилларда давр билан баробар қадам ташлаб, ижодий камолотга эриша борган Ойбекнинг ҳақиқий санъаткорларга хос заҳматкашлиги, ишчанлигига ҳайратда қоласан киши. Шу ўн йилликда у илмий-педагогик иш билан ҳам озмунча шуғулланмади. 1930—1935 йиллар мобайнида Ўрта Осиё Давлат университетида, Ўрта Осиё план-иқтисод институтида сиёсий иқтисод фанидан дарс берди. Сўнгра Ўзбекистон Маданий қурилиш илмий-технишириш институти (1933 й.) ва Пушкин номидаги Тил ва адабиёт илмий-технишириш институтида (1934—1937) илмий ходим ва сектор мудири вазифасида ишлаб, ўзбек адабиёти тарихи ва совет адабиёти бўйича илмий-тадқиқот ишлари олиб борди. У «Навоийнинг ҳаёти ва ижодий», «Абдулла Қодирийнинг ижодий йўли» ҳақида монографик асарлар ва бошқа бир талай мақолалар яратди. Унинг илмий асарлари учун тўплаган материаллари шоирнинг бой фантазиясида жонланиб, образларда гавдаланиб, бадиий ижодининг гуркираб ўсишига ҳам кўмак берар эди. Шу тариқа бадиий ижод билан бир вақтда Ойбекнинг адабий танқидчи, адабиётшунос сифатида порлоқ таланти ҳам намоён бўлмоқда эди.

Булардан ташқари Ойбек яна бир талай шеърлар, поэма кетидан поэмалар («Дилбар — давр қизи», «Ўч», «Бахтигул ва Соғиндиқ», «Темирчи - Жўра», «Қаҳрамон қиз», «Гулноз», «Камончи»), классик ва ҳозирги замон адабиётiga оид илмий, танқидий ва публицистик мақолалар яратади. Улуғ рус шоири А. С. Пушкиннинг шоҳ асари «Евгений Онегин»ни тез фурсатда ва оригиналга жуда яқин қилиб таржима этиши, рус ва жаҳон адабиётидан қилинган бошқа қатор адабий-бадиий таржималари ҳам таҳсинга сазовордир.

Ойбек тўнгич поэмаси «Дилбар давр қизи»да (1933) йигирманчи йилларнинг ўрталарида Ўзбекистонда хотин-қизлар озодлиги йўлида олиб борилган курашларни акс эттирди. У поэма жаپрида биринчилардан бўлиб ижобий аёл образини кенг планда тасвирлади, ёш Дилбарнинг ўсиш эволюциясини, совет тузуми шаронтида ижтимоний

ҳаёт қуришга тайёрланишини кўрсатиб берди. Поэмада аёллар озодлигининг душманлари — савдогар-нэпманлар. образи реалистик равишда фош қилинди.

Ойбек ўзбек ва қозоқ хотин-қизларининг инқилобдан аввалги оғир ҳаётӣ ва тақдирини кўрсатган «Ўч» (1932), «Бахтигул ва Соғиндиқ» (1933) поэмаларида тарихий мавзуни кўтариб чиқди. «Темирчи Жўра» поэмасида (1934) Октябрь инқилоби ва гражданлар уруши даврида ўзбек ишчи ва меҳнатчиларининг золимларга ҳарши революцион курашга фидокорона отланганини тасвирлади. Муаллиф темирчи Жўра ва ишчи Турсунлар сиймосида гражданлар уруши қизиган пайтда жонини аямай Ватан душманлари ва хоинларига ҳарши курашган ўзбек меҳнаткашларининг ёрқин образини яратди. Асарда мард ва фидокор Жўра образи реалистик тасвирланди, инқилобий романтика унга таркибиб ёки қисм бўлиб кирди.

Ойбек 30-йилларининг ўрталарида испан халқининг демократия, озодлик йўлида фашист газандаларнiga ҳарши оғир шароитда олиб борган курашини «Қаҳрамон қиз» поэмасида (1936) то сўнгги қони қолгунча душман билан жанг қилган Эмилия образида чизиб берди. Тенг бўлмаган кучлар курашида қаҳрамоннинг фожиали ўлимига қарамасдан, ҳаётбахш романтик руҳ бу асарнинг қон-қонига сингдирилган.

Ойбек «Гулноз» поэмасида (1936) колхозларни ташкил қилиш ва мустаҳкамлашда етилган ажойиб ёшлиар образини, «Навоий» поэмасида (1937) XV аср улуғ ўзбек шоири ва мутафаккири образини яратди.

Ойбек поэмачилик соҳасидаги бой тажрибасини давом эттириб, уруш йилларида ўзбек халқининг пахтачилик соҳасидаги фидокорона меҳнатини ёритган «Қизлар» (1947), ўзбек совет адабиётининг асосчиси Ҳамза Ҳакимзоданинг Шоҳимардонда кечирган сўнгги ҳаёт йўли ва ўлими фожиасини шоирона ҳис-туйгу, юксак поэтик пафос билан гавдалантирган «Ҳамза» (1948), Покистон ҳалқи ҳаёти тўғрисида «Зафар ва Заҳро», «Ҳақгўйлар» (1950) ва бошқа поэмаларини ёзи.

Инсон шахсининг ўз даври ҳаракати билан кўп қиррали муносабатли ўсишини кўрсатиш Ойбек поэмалари образи тўлақонли, сермазмун бўлиб чиқишини таъминлади. Шоирнинг Узбекистонда хотин-қизлар озодлигининг дастлабки босқичини акс эттирган «Дилбар — давр қизи», ўтмишдаги севги фожиасини тасвирлаган «Ўч», шахсий эркинлик ва баҳт учун курашини кўйлаган «Бахтигул ва Соғиндиқ», Октябрь революцияси учун бўлган жангларда

тобланмиш инқилобчилар образини гавдалантирган «Темирчи Жўра», испан халқининг демократия ва озодлик йўлида фашизмга қарши олиб борган жанглари манзарасини чизиб берган «Қаҳрамон қиз», қишлоқларимизни колективлаштиришнинг иқтисодий, маданий ва маънавий ҳаётимизга кўрсатган куч-қудратини ифодалаган «Гулноз», улуғ шоир ва мутафаккир Алишер Навоийга бағишлиган «Навоий» поэмалари қаҳрамонларидан тортиб, халқимизнинг узоқ ўтмишда (XIII асрда) чет эл босқинчиларига қарши кураши тарихини ҳикоя қилувчи драматик поэма «Маҳмуд Торобий», совет халқининг Улуғ Ватан урушидан кейин бошланган халқ хўжалигини тез суръатлар билан тиклаш ва пахтадан юқори ҳосил олиш ҳаракатини ёритган машҳур «Қизлар», ўзбек совет, адабиёти асосчиси образини яратган «Ҳамза», Покистон меҳнаткашлари ва зиёлиларининг тинчлик, демократия ва озодлик йўлида олиб борган курашларини тасвирлаган «Зафар ва Заҳро», «Ҳақгўйлар», болалик хотираларини поэтиклиштирган «Бобом», вайронлик ва оғат келтирувчи урушларга қарши барқарор тинчлик учун курашнинг чуқур гуманистик мөхиятини ифодаловчи «Даврим жароҳати», ўтмишдаги севги фожиасини мудҳиш социал фожиа сифатида талқин қилувчи «Гули ва Навоий» поэмаларининг ажойиб образларига қадар замон ва инсон проблемасининг ўзаро муносабати, давр ва инсон тақдиригининг ўзаро диалектик боғланниши ҳаққоний ва ёрқин гавдалантирилганини кузатиш мумкин. Бу поэмаларнинг қаҳрамонлари ё феодал-патриархал ахлоқ ва урф-одатларга қарши чиқадилар, ё ижтимоий адолатсизлик, тенгсизлик, миллий зулм томирларини қирқиши учун исён кўтарадилар, янги инсон учун бўлган синфий ва гоявий жангларда қатнашадилар, янги ҳаёт равнақи учун курашда камолга эришадилар. Тарихан катта аҳамиятга эга бўлган жараёнда улар маънавий етиладилар, чиниқиб, ўзлигини тушуниб борадилар, уларнинг миллий ва синфий онглари ўсади, гражданлик туйғулари шаклланади, интернационал алоқалари кучаяди, мустаҳкамланади.

Ойбек поэмаларида контраст образларни асар марказига қўйиш характерлидир. Дилбар нэпманларга, Холхўжа Ҳошимбойвачча ва инқилоб душманларига, Соғиндиқ катта феодал-чорвадор Отабойга, темирчи Жўра бойлар ва революция душманларига, Навоий султон Ҳусайнга, Ҳамза шайхларга зид қўйилади. Лекин, ҳар икки қутбдаги образлар ҳамиша индивидуаллаштирилган характерларининг муқоясасидан иборат бўлмай, балки бир-бирига зид со-

циал-синфий, ахлоқий-психологик принципларнинг тўқнашувларини ҳам қамраб олади.

Поэмаларнинг лирик маркази доимо ижобий қаҳрамонга қаратилган бўлади. Салбий образлар эса ижобий қаҳрамон характерини ҳаракатда кўрсатиш учун антитета сифатида хизмат қиласидар. Башарти Ҳошимбойвачча бўлмаса, Лаълихоннинг фожиаси ва Ҳолхўжанинг ўч олиши кераксиз бўлиб қолар эди, реакцион руҳонийлар Шоҳимардонга ин қўймагандан, Ҳамзанинг бу ерда курашчанлик имкониятларини тўлиқ намоён қилиши мумкин эмас эди. Мулкдорлар революцияга қарши бош кўтартмагандан, темирчи Жўра қаҳрамонлигининг ҳалқчил моҳияти тийран очилмаган бўлар эди ва ҳоказо.

Лекин «Қизлар» поэмасининг конфликт чизиги бундан бошқача. Бу поэмада немис-фашистларнинг Ватанимизга хоинона бостириб кириши туфайли қишлоқ хўжалигида пайдо бўлган етишмовчилик ва «ўприлиш»ларни йўқ қилиш учун кураш сюжет ва композицион муқояса ва психологик асос коллизияларини ташкил этади ҳамда характерни «таранг» ҳолатда кўрсатишга хизмат этади. Бу поэмада контраст чоғиштирма салбий ё эпизодик тарзда тасвирланади (қизлар отасининг фронтда ҳалок бўлиши, жангдан ярадор бўлиб қайтган Мадъёрнинг ҳикояси ва ҳоказо) ёки персонажлар ва авторнинг маккор душман ёвуэлигига бўлган ғоявий-эстетик муносабатида очилади. Ҳар қандай поэмада ижобий образларнинг ғолибона куч-куврати салбий ҳодисаларни ларзага келтириб, мағлубиятга дучор этади, бир-бирига зид интилишлар ва қарашларнинг беллашуви ва мумтоз совет ватанпарварлиги идеяларининг енгувчанилиги яққол гавдаланади.

Ойбекнинг поэмаларида, худди лирикасидаги сингари, образларнинг ўймакорлиги, қуймалиги таҳсинга сазовордир. Портрет, аъзо ҳаракатлари, нозик қилиқлар, чеҳрадаги ўзгаришлар фақат вазиятнигина эмас, ҳатто характернинг моҳиятини очишга қодирдир. Отабой Қарқарадан қайтгач, никоҳида бўлган Бахтигулни катта хотини қўлига: «Мана бу чўри сеники буткул» деб топширади.

Шунда:

Бойвачча бека дер ранги ўчиб:
—«Оёғи қутли бўлсин илоҳим!»
Бекага боқар Бахтигул чўчиб
Қадайди ерга кўзларини жим.

Беканинг ранги ўчишида эрининг феълини яхши билган аёлнинг ҳақиқий аҳволини ичдан түйиши, рашки, айни замонда эрига гап қайтаришдан қўрқиши ифодаланган.

Бахтигулнинг бекадан чўчиб ерга қарашида зулмдан зада бўлган чўрининг ҳуркак табиати, орномуси бәрбод этилганидан уялиши акс этиб турибди.

Холхўжага биринчи бўлиб муҳаббатини сездириб, Лаълихон унга «кўз сузди, чиройли кулдиз», уларнинг кўксидаги ёнган севги тошиб чиққан кезларда Холхўжага «Лаълихон ширин, шўх боқди». Аммо Холхўжа қамалиб, қизнинг Ҳошимбойваччага узатилиши маълум бўлгач, энди Лаълихонда «юз сўлғиң, бош букик, пармалайди ўй... юрагини чақар хасрат илони...».

Темирчи Жўранинг меҳнатсеварлиги меҳнат билан фахрланиши, текинхўрларни менсимаслиги, баҳодирлик табиати портрет чизиқларида ёқ нақшланган:

Тинмас кундуз, тинмас кечা,
Елкаси кенг, қулочи зўр.
Дош келомас шерик неча,
Ҳаммасига зарби ҳам жўр.
• Тўнж рангли юз, куюнди қош,
Ажинлари чукур-кескин.
Ҳамиша тик, ғурурли бош,
Фақат кўзлар сокин, майнин...

Ойбек поэмаларида персонажларнинг руҳий ҳолати, кечинмалари кўп ўринда нақшинкор қилиб тасвириланади. Ўймакорлик санъати доирасига қиёфа ўзгариши ва аъзолар ҳаракатининг конкрет деталлари тасвиридан ташқари персонажларни қуршаган муҳит, предмет, жиҳозлар, воқеа ўрни тасвири, пейзаж, нутқ характеристикаси, тасвирий — тил воситалари — эпитет, ўхшатиш, мажозий ибора ва ҳоказолар жалб қилинади. Кўринишда статик бўлиб кўринган бу жисмоний образлар ички ҳаракат ва руҳий ўзгаришларни акс эттирувчи воситаларга айланиб, динамик тус олади.

Ойбек поэмаларишинг барча бадиий компонентларида реалистик тасвири асослари яққол кўзга ташланиб туради. Шунинг учун севги ва садоқат поэмаларида ҳам романтик парда, кўтаринки услуб тагида образларнинг реалистик характеристери ёрқин кўриниади: сюжет ва персонажлар социал-тарихий ва психологик жиҳатдан типик томонлари билан кўрсатилади. Персонажларнинг тасвирида, ударнинг тириклилик шарт-шароитида, хатти-ҳаракатларида, портрет ва уст қиёфаларида ўзига хос ҳаётий элементлар сақланади. Ойбек поэмаларида тобора романтик стиль ўз ўрнини соф реалистик воситаларга бўшатиб беради. Аммо эмоционалликнинг жўшқин ифодаланишига персонажларни лирик бўёқда тасвирилаш, шеър мусиқийлиги ва оҳанг-

дорлиги соф реалистик поэмаларига ҳам сингиб кетади ва такомиллашади.

Ойбек поэмаларининг реализми ҳаммадан бурун ва биринчи галда ҳалқ руҳига чуқур кира билганлиги билан белгиланади. Конкрет-тариҳий шароитнинг индивидуаллашган тафсилотларини ҳаққоний гавдалантириш, образларни характерли ва рўйи-рост кўзга чалинадиган қилиб тасвиrlаш теран ҳалқчиллик ва партиявийлик асосида юзага келади. *

* * *

Ойбекнинг поэзиядан прозага ўтиши осонликча бўлмади. Бу тўғрида у «Халқ ва партия тарбиясида» деб номланган автобиографиясида қўйидагиларни ёзди: «Уттизинчи йилларнинг биринчи ярмида бир неча поэма ёздим, лекин менин кўпроқ проза ўзига жалб қила бошлади ва ҳозирги замон темасида кенг умумлаштирувчи асар ёзишга ўзимда катта эҳтиёж сездим. Бунга бирданига эришиб бўлмади. «Студентлар» романи устида ишлай бошладим, лекин уни тамомламадим, турмуш ва адабий тажрибамни кенгайтиришим, янги гап айтишим лозим эди». Ҳақиқатдан ҳам, адаб «турмуш ва адабий тажрибасини кенгайтириш» мақсадида элга хизмат қилиш доирасини кенг қамраб олишга ҳаракат қилди. У фақат шоирлик фаолияти билан чекланмасдан, балки жамоатчи, публицист, танқидчи, адабиётшунос олим, бадиий асарлар таржимони сифатида кўп ишлади. Ойбекнинг ҳаёт тажрибаларининг ортиши, социалистик қурилишда, маданий-адабий жабҳада актив иштироки, лиро-эпик асарлар яратиш маҳоратини эгаллаганлиги, тинмай ўқиш-ўрганиш, илмий тадқиқот билан жиддий шуғулланиши прозага ўтиш жараёнини тезлаштируди. «Сёкин-секин прозага орзу-ҳавас ошарди кўнглимда,—деб ёзган эди Ойбек,— чунки ёшлигимдан билган эртаклар, чўпчаклар, Ўзбекистонда у замон чиқсан бир мунча китоблар, ҳикоялар, айниқса, болалигимдан ўзбек ҳалқи турмушидан хотиралар менга кўп таъсир қилган эди. Мен проза соҳасига қизиқиб, ўргамчик машқлар билан машғул бўлдим. Лев Толстой, Тургенев асарларидан ҳам таъсирланар эдим, лекин асосан Горький асарлари менда чуқур таъсирли из қолдирган эди. Горький асарларини мукаммал ўрганиб, ҳазм этдим, сингдирдим ва Горькийнинг асарлари хазинасидан олган сабоқларим ёрдами ила ўзим проза соҳасида йўл топдим. «Қутлуғ қон», «Навоий», «Олтин водийдан шабадалар» асарларимни яратдим».

Ойбекнинг бадиий прозадаги дастлабки тажрибаси «Глобус» ҳикояси (1934) бўлди. Бу ҳикояда ёзувчи Узбекистонда шиддат билан ривожланаётган маданий революция жараёнини, ҳамма, энг оддий ишчиларга қадар илмифан масалалари билан жуда қизиқишини акс эттириди. «Глобус» ҳикояси ва ёзувчининг, ўз эътирофига кўра, муваффақиятсиз чиққан «Студентлар» романни устида олиб борган жиддий машқлари унинг қаламини чархлади ва, ниҳоят, 1938 йилда ёзилиб 1940 йилда алоҳида китоб ҳолида нашр этилган машҳур «Қутлуғ қон» романни яратилди.

Ойбекнинг ижодий меҳнат активлиги «Қутлуғ қон» романини ёзиш тарихида жуда яққол кўзга ташланади. Вульгар социологизмнинг ашаддий тарафдорлари шоир ижодиёти мазмунини бузиб кўрсатиб, ёзувчини адабий ҳаракатдан сунъий равишда четлаштиришга уринган оғир бир пайтда, у тетик руҳ билан, ижодининг партиявийлигига тўла ишонган ҳолда, бутун юраги, ақл-идроқи, инсонга меҳрмуҳаббатини ижодга сарф қилди. У шу қадар қизғин илҳом билан қалам тебратдики, олти ой бадалида миллий озодлик ҳаракатида меҳнаткаш ҳалқ онгининг мунаварлашишини тасвирлаган, фоявий-бадиий жиҳатдан юксак, умумсовет адабиётининг классик кутубхонасидан абадий ўрин олган «Қутлуғ қон» романини ёзib битирди.

Адаб «Қутлуғ қон» романида ўзбек ҳалқи тарихи ва тақдиррида жуда катта аҳамиятга молик бўлган, ҳалқ оммасининг тарих яратувчи кучини ёрқин намойиш этган, социал тўқнашув ва коллизиялар бўртиб кўринган кескин бурилиш даври—ўзбек ҳалқининг революциядан аввалги оғир ҳаётини тасвирлади, бой-савдогарлар, маҳаллий ва чор амалдорлари томонидан эксплуатация қилинган, хўрланган, жабрдийда мөҳнаткашлар синфий онгининг тобора ўсишини, эзувчиларга қарши жиддий курашга ва қўзғолонга отланишини ёрқин акс эттириди. Бу романда инсон ва табиат (меҳнат), шахс ва ҳалқ (коллектив), ҳалқ ва тарих, ҳозирги замон ва тарихий ўтмиш проблематикасини ёритиш, уларнинг ўзаро муносабатини ҳаққоний, реалистик акс эттириш, қаҳрамонларнинг социал психологиясини очиш характерлидир. Адабнинг ҳалқ характеристерини тарихий тараққиётга боғлиқ ҳолда тасвирлаш санъати, шубҳасиз, миллий заминда туғилди ва шаклланди. У классик адабиёт, ҳалқ оғзаки-поэтик ижоди, ўзбек совет адабиётининг биринчи намояндлари тажрибаларига суюнди. Бироқ миллий адабиёт традицияларини ривожлантиришда қардош ҳалқлар адабиётларининг бир-бирини бойи-

тиши ҳам ҳал қилувчи аҳамиятга эга бўлди. Ойбекнинг образли тафаккури, бадиий онги ғоят серқирра кўп миллатли ижодий тажриба билан тўлишди, мукаммаллашди.

Аммо Ойбек «Қутлуғ қон»да ҳаётни тасвирлашга мустақил ёндашади, ўзидан аввалгиларни сира тақрорламайди, ҳаётда янги туғилган ҳодисаларни пайқаб олиб, реалистик традициялар доирасини кенгайтирди, образнинг бадиий мазмунини тўлдирди. Бу романнинг яратилиши янги миллий адабий традицияларнинг ривожланаётганидан, ўзбек совет адабиёти умумиттироқ ва жаҳон адабиётининг ғоявий-эстетик савиясига тенглашаётганидан ҳам далолат берар эди.

Адид «Қутлуғ қон» романидә биринчи жаҳон уруши ва унинг арафаси (1912—1916) йилларида мустамлака Туркистонда капитализмнинг тараққий этиши йўлинүй, синфий курашининг қандай ривожланиши, жафокаш меҳнаткашлар оммасининг манфур эксплуататорларга қарши олиб борган курашини ҳаққоний кўрсатиб берди.

Асарда меҳнаткашларнинг жафоли ҳаёти, уларнинг вакили Йўлчи образида гавдалантирилган. Йўлчи тарих тўлқинлари оқимида, тарихий ривожланиш қанотида ҳаракат қиласди. Оилавий-маиший, социал-синфий тўқнашувлар натижасида аста-секин унинг онгида уйғониш пайдо бўлади, ақл-заковати, ироди кучи аниқ мақсадга, халқ манфаатларига, халқ устидаги зулм кишанларини узишга қаратилади. Уз замонасининг озодлик ва демократик ҳаракати истиқболида тасвирланган Йўлчи ижтимоий мұҳит маҳсулигина эмас, балки унга таъсир кўрсатувчи, уни ўзгартириш, ҳаётда янги муносабатлар ўрнатиш учун йўл очувчи актив курашли ҳамдир. Меҳнаткаш халқ манфаатлари тақдиди ва истиқболини кўзлаб замонасининг қаҳрамони (Йўлчи ва шериклари образи) характерининг ўсиши, маънавий ички дунёсининг бойишини кенг тасвирлаш орқали роман пафоси очилади, ғоявий-эстетик қиммати намоён бўлади. Романда ёзувчи меҳнаткаш халқнинг бошқа вакиллари образларини ҳам яратди. Ойбек эксплуататорлар, бойлар дунёси ҳаётини ҳам кенг ёритди. У, ўзбек миллий буржуазиясининг турли бўғинлари ва группаларининг етук образларини (Мирзакаримбой, Фазлидин, Абдишукур ва бошқалар) яратди ва тип даражасига кўтарди.

«Қутлуғ қон» роман катта бадиий маҳорат билан ёзилган. Муаллиф асарнинг ғоявий мазмунини очиш учун хилма-хил бадиий воситалардан фойдаланди. Воқеалар давомида ёзувчи ўз қаҳрамонларини турли аҳволда ва турли шароитда кўрсатди. Шу билан уларнинг характер-

ларидаги айрим хислатларни очиб ташлади, ички ва ташқи қиёфаларини ва портретларини чизди.

Ойбекнинг «Навоий» романи (1944) ўзбек халқининг XV асрдаги ҳаётини ёртишга бағишиланган тарихий-биографик асардир. Романида XV асрнинг тарихий ҳодисалари оқимида улуғ ўзбек шоири ва гуманисти Алишер Навоий ҳарактеридаги инсонпарварлик ва халқчиллик фазилатлари тоблана боради. Навоийнинг дунёқараши ва гуманизми, кураш ва интилиши, хатти-ҳаракати, эзгу ниятлари, ахлоқий дунёси ва даҳосининг гўзаллиги, айни пайтда XV аср умумхалқ ватанпарварлик руҳи, халқнинг маълум даражада ижтимоий-миллий кўтарилиши, ҳукмрои социал синфий табақалар зулмидан, нобоб тартиблардан норозилиги, ўз аҳволини англаш,adolatga талпиниш йўлидаги интилишлари ҳам ўз аксини топди. Навоий бош турган ҳолда бутун ижобий шахслар биографияси ва тақдирида халқнинг тарих яратишдаги роли ва тақдири бадиий умумлаштирилди. Демак, Ойбек XV аср ўзбек ижтимоий ҳаётининг кенг манзарасини, аҳодининг «юқори» ва «қўйи» қатламлари турмушини зўр маҳорат билан тасвирлаб берган. «Навоий» романида муҳим тарихий фактлар ва ҳодисалар ташқи фон бўлиб қолмай, бадиий тўқиманинг асосини ташкил этди. Навоийнинг халқ манфаатлари, давлатни бирлаштириш йўлидаги ҳаракатлари оқибатида маънавий-гоявий жиҳатдан янада етилиши, ўз тақдири фожиасини тушуниш даражасига кўтарилиши, подшо Ҳусайн Бойқаро илтифотидан юз ўғирса-да, халқчил-гуманистик идеалларга содиқ қолиши ўзининг юксак бадиий ифодасини топди. Ойбек «Навоий» романида тарихий ҳақиқатнинг асосий моментларини тўғри ёритган. XV аср тарихини ҳаракатга келтирган қарама-қарши кучни бадиий лавҳаларда кўрсатиб берди.

Ойбек «Олтин водийдан шабадалар» романида (1949) Улуғ Ватан урушидан сўнг Ўзбекистонда пахтачиликни янада ривожлантириш, пахтадан мўл ҳосил етиштириш процессида социалистик қишлоқ кишилари характеристикинг шаклланишини, улар онги ва психологиясида содир бўлган ўзгаришларни кўрсатиб берди.

Ойбек совет кишиларининг оташин ватанпарварлик интилишларини, уларнинг Коммунистик партия раҳбарлигида узлуксиз олға босишлиарици, уларнинг ички дунёсини ёритиб беришни ҳам ўз олдига мақсад қилиб қўйди. «Нур қидириб» повести (1957) Ойбекнинг Покистонга қилган сафар таассуротлари остида яратилди. Повестда Покистон ишчилари, тараққийпарвар кишиларининг тинчлик, озод-

лик, мустақиллик ва демократик ўзгаришлар йўлидаги курашлари, ҳақиқатга, нурга интилишлари, улар онгининг ўсиши тасвирланди. Буни кескин социал-синфий ва сиёсий тўқнашувларда акс этган, ҳалқнинг ҳаққоний иши учун жонбозлик кўрсатувчи, илм-маърифат тарғиботчиси ўқитувчи Аҳмад Ҳусайн, ўткир иродали коммунист шоир Муҳаммад Жамол, ишчи ва меҳнаткашларнинг озодлиги йўлида куч ва файратини аямайдиган Шариф Сулаймон профессионал инқилобчи Фулом Шер, аёллар озодлигининг жонкуяри ажойиб қиз Искандаро ва бошқа образларда кузатиш мумкин.

Ойбек Улуғ Ватан уруши йилларида ўзбек аскарлари ва офицерлари ҳаётини, қаҳрамонлигини яқиндан ўрганиш, Совет Армиясининг қудратини кўриш ниятида Ватан уруши фронтларига борди, жанг бўлиб турган ерларни ўз кўзи билан кўрди. Жангчилар билан ертўлаларда ётди, озод этилган қишлоқларни кезиб, аҳоли билан учраши, «Қуёш қораймас» романига материал ва фактлар тўплади. Шу йилларда асарнинг айrim боблари ва парчалари босилиб чиқди. Лекин роман анча йиллардан сўнг — 1959 йилда тугалланди. Ойбек романда урушнинг энг оғир йилларида бир батальонда хизмат қилган ва рус командирлари, социалистик интернационализм руҳида чиниқсан кишилар таъсирида ғоявий ва профессионал жиҳатдан улфайган ўзбек Бектемир, Асқар полвон, Али тажанг ва бошқалар образини яратди. Бектемир турли миллат солдатлари билан ёнма-ён жанг қилиб, ўз тақдирини батальон тақдирни билан маҳкам боғлади.

«Болалик» повестида (1963) меҳнаткаш ҳалқ ичидан чиққан ўш бола Мусо характеристининг шаклланиши, ички маънавий ўсиши ҳақида ҳикоя қилинади. Лекин бу ички ўсиш ташқи муҳит билан, ҳар хил одамлар билан ўзаро муносабатда юзага келади. Одамлар Мусога ҳаётни, меҳнатни, кишиларни севишини ўргатадилар, табиат, санъат, ҳалқ оғзаки поэтик ижодиёти гўзаллигидан завқланишини унинг дилинга қуядилар. Мусонинг фикр ва туйғулари ўз ҳалқи ва қардош ҳалқларнинг энг яхши намояндалари, уларнинг ҳалқчил фикрлари билан алоқада онглилик касб этади. Демак повестнинг реалистик образлари (Мусо ва бошқа персонажлар) орқали 1909—1918 йиллар ижтимоий ҳаётида содир бўлган янгилик сари силжиш ва бўронли ҳодисалар, ҳалқ оммасининг эксплуататорлик тузумига нисбатан стихияли норозиликдан Коммунистик партия раҳбарлигига онгли инқилобий ҳаракатга қўшилиши ҳам ўз аксини топган.

Ойбек машҳур «Қутлуғ қон» романининг тарихий-гоявий давоми сифатида яратилган «Улуғ йўл» романида Февраль инқилоби кеъларида ўзбек меҳнаткашларининг ишчилар ва рус большевиклари атрофига тобора жисплашиб, эксплуатация сиртмоқларини парчалаб ташлаш учун кўтарилишини, фоят мураккаб вазиятда барча реакцион кучларга қарши ҳаёт-мамот жангларида омманинг инқилобий онги тобланишини, натижада Улуғ Октябрь социалистик инқилоби ғалабасига эришишини тасвиirlайди. Романда ижобий ва салбий характерларнинг ўзаро муносабати ва кескин тўқнашувлари, улар хатти-ҳаракати, феълиатвори, ирода йўналиши ва ички дунёсининг ёритилишида даврнинг ижтимоий-синфий зиддиятлари ёрқин гавдалантирилди. Мадраса шогирди, лекин томир-томири билан халқ-қа туташган Умарали образида зиёлиларнинг инқилобий шароитда ички зиддиятларини енгиг, қайта туғилиши бадиий ифодасини топди. Инқилобий вазиятда, демократик табақалар, ишчилар ва большевиклар билан мулоқот ва алоқаларда, бойлар-уламолар билан тўқнашувларда Умаралининг эътиқоди, онг, психологияси ва кечинмаларида янгиликлар пайдо бўлади, сиёсий қарашлари сайқаллашади. У диний хурофот, сиёсий қолоқ тушунчалардан холос бўлади. Реакцион гурухларнинг таъқиби ва қамоқ жазоларига бардош беради. Ишчи ва инқилобчи дўстлари сафид қўлида қурол ушлаб, Октябрь инқилоби ғалабасига ҳисса қўшиш шарафига мұяссар бўлади. Шу равишда Ойбек «Улуғ йўл» романида аввалги полотноларида гавдалантирилган, жамиятдаги разолатларни аёвсиз фош қилувчи, прогрессив, инқилобий ҳаракатларни қаттиқ ҳимоя қилувчи реализм тенденцияларини ўзига хос суратда давом эттириди.

Ойбек насрый асарларида турли даврлардаги халқ оммасининг ҳаётини, меҳнаткашлар турмушини яхшилаш, меҳнатни эксплуатация сиртмоқларидан озод қилиш, социализм ва коммунизм учун бўлган курашларни асосий мавзу қилиб олди. Бунинг учун ўзининг ҳар бир роман ва повестида халқ оммасининг тарих яратувчи кучини намоён қиласидиган муҳим бурилиш даврларини танлади.

Ойбек романларида халқ тарихидаги энг муҳим ва кўтаринки даврларни акс эттирганлиги натижасида характерларни қизғин социал конфликт ва тўқнашувларда тасвиirlашга муваффақ бўлди, қаҳрамон характерининг социал-сиёсий ёки инқилобий шароитга боғлиқ эканлигини, давр таъсирида етилганини чуқур ҳис этди, халқ ҳаракатининг ўсишини қаҳрамоннинг улғайиши, чиниқиши ва маъ-

навий дунёсининг бойиши орқали кўрсатишга эришди: айни замонда серҳаракат, давр ўзгартирган янги, курашчан киши характерининг ҳаётга таъсир этувчи, воқеликни ўзгартувчи, янги жамият қурувчи қирраларини яққол на-моён қилди.

Ойбек насрый асарларининг яна характерли хусусиятларидан бири, уларнинг чуқур тарихийлигидир. Тарихийлик фақат характерларнингина эмас, балки шароитни ҳам тадқиқ этишда ўз ифодасини топди. Воқеликни ҳаққоний, конкрет-тарихий ва инқилобий ривожланишда тасвирлаш вазифаси хоҳ замонавий, хоҳ тарихий масалаларни ишлашда бўлмасин амалга оширилди. Тарихийлик характерларнинг шаклланиши ва камолоти жараёнини, уларнинг инқилобий давр шарт-шароити билан боғлиқлиги сабабларини тадқиқ этишда ифодаланади.

Ойбекнинг прозаик асарларида қаҳрамонларнинг характерлари истиқболни, янгиликни ҳис қилишга қаратилган бўлади. Адиг зулматга ботган ўтмишнинг разилликла-ри ҳақида ҳикоя қилганда ҳам поэтик пафос билан ижобий қаҳрамон характеридаги қандайдир инсоний гўзалликни ифодалайди, ўтмиш замоннинг ҳақорат, қон ва фожиаларга тўлиқ ҳодисалари орасидан ҳам халқ ҳаётини яхшилик сари ўзгаришга интилган кучни, нурни кўрсатади, характерларнинг ҳужумкор қирраларини бўртиради, уларнинг ирода йўналишлари аниқ мақсадларга қаратилганини таъкидлайди, шу билан халқнинг тарих яратувчи куч-қудратини акс эттиради. Лекин қаҳрамонлар характерининг бу актив хусусиятлари, интеллектуал ва психологик ўзгаришлари образлар тўқимасидан туртиб чиқмайди, балки социал мотивировкалар билан, табиий ва, ишонарли вазиятлар билан изоҳланади.

Ойбек йирик проза асарларида тарихий ва замонавий воқеаларни тасвирлаганда, ҳар бир даврнинг айрим томонларини эмас, балки бутунисича, атрофлича, тўлалиги билан қамраб олишга улгуради. Адиг қаҳрамонларининг индивидуал қиёфаси, хатти-ҳаракатини, феъл-авторини, улар онгига пайдо бўлган социал-психологик ўзгаришларни, маънавий-интеллектуал янгиликларни ёритар экан давр оқимини, тарихий ҳаракатнинг прогрессив моментларини, умуминсоний проблематикани ҳам акс эттиради. Шунга мувофиқ сюжетни социал тўқнашувлар, сиёсий ихтилофлар, оиласвий жанжаллар, севги можоралари, таранг ва зиддиятли вазиятлар ичida ўстира боради, шахснинг улғайишини, маънавий, ахлоқий камолотини ижтимоий сабаблар билан белгилайди.

Ойбек бадий асарларининг коммунистик эртани яқинлаштиришга руҳлантирувчи пафосида унинг самимият билан тूла пок қалби, меҳнаткаш халққа чексиз меҳри, умумбашарий, коммунистик идеалларга содиқлиги ҳам зўр бадий куч билан акс этган. Улуғ ёзувчилар ижодиётида бўлгани каби Ойбек адабий меросининг ҳамма турларида унинг шахси ҳам ўзининг ёрқин ифодасини топган. Зотан, лирик шоир ва хаёли кенг адаб Ойбек ўзининг энг яхши ҳаёт тажрибаларини, маънавий гўзаллигини, фалсафий ва сиёсий тушунчаларини, тарихий ва замонавий билимларини, ахлоқий-инсоний фазилатларини, эзгу ниятларини лирик қаҳрамонлари ва эпик образларининг гоявий-эстетик магнита узвий едериб юборган. Ойбекнинг кенг феъли, саховатпеша, инсонпарвар табиати билан изчил гуманистик ижоди ўртасида ажралиш йўқ. Унинг барча олижаноб фазилатлари, маънавий дунёсининг зангинлиги ижодиёти пафосига, образларининг қонига сингган. Унинг асарларининг бадий марказини, гоявий-эстетик компонентлар бирлигини маълум маънода «автор образи» ташкил этади. Йўлчи, Навоий, Ўқтам, Бектемир, Аҳмад Ҳусайн, ёш Мусо, Умарали ва бошқа ҳисобсиз ижобий образлар адебнинг юрак тепишидан ҳам озуқа оладилар. Шу жиҳатдан Ойбекнинг адабий қаҳрамонлари, типлари том маънода унинг ижодий «фарзандлари»дир.

Дуруст, санъаткор ўзининг ижодида, юқорида айтганимиздек, ўз тарихий, ижтимоий ва оиласвий-ахлоқий муҳити билан белгиланган характерларни тасвирлайди, халқ характерининг муҳим объектив хусусиятларини ўзига хос сифатлари билан акс эттиради, кишиларни тарихий давр жараёни ва ривожига чамбарчас боғлиқ ҳолда ҳаётнинг мураккаб, кескин ва таранг пайтида кўрсатади. Лекин шу жанговор тарихий ва ахлоқий синовда қаҳрамонлик, одиллик, халқпарварлик хислатларини намойиш қилаётган кишиларнинг маънавий қиёфасида шоир ва адаб табиатининг баъзибир қирраларини кўриш, «таниб олиш» мумкин бўлганидек, Ойбек маънавий дунёсининг бойлиги айрим томонлари билан уларда ҳам ўз аксини топган. Шунинг учуноқ Ойбек бадий ижодиёти, яратган образлари билан ўзига ҳам мужассам ҳайкал ўрнатиб, сафимиздан мангу ўрин олди. У ҳар бир асарининг мазмуни ва образлари билан ҳам китобхонлар ўртасида яшамоқда, уларни ҳаяжонлантириб, уларга гоявий-эстетик ва тарбиявий таъсир кўрсатиб, қалбларини мусаххар этмоқда.

Ойбекнинг танқид ва адабиётшуносликка оид асарлари унинг бадий асарларини янада чуқурроқ ўрганишга им-

коният туғдиради. Бунда унинг назарий-эстетик қарашлари билан бадиий практикаси ўртасида узвий боғланиш, муштараклик борлиги, ҳар икки соҳа қўшилиб, унинг шахсини янада тўла гавдалантириши диққатга лойиқdir. Адид «Навоий» романи устида иш олиб борган кезларида бу бирлик айниқсан яққол кўзга ташланди. Муаллиф романни ёзишга киришмасдан бурун улуғ шоир Навоийнинг яшаган даври, ҳаёти ва ижодиёти тўғрисида материал тўплабгина қолмасдан, балки жиддий илмий-тадқиқот ишларини олиб борди, Навоийнинг ҳаёти, фазаллари, достонлари («Хамса»), дунёқараси ҳақида маҳсус илмий асарлар яратди. Бу эса ўз навбатида «Навоий» романи, «Навоий», «Гули ва Навоий» поэмаларини ёзишда жуда қўл келди.

Шундай қилиб Ойбек бадиий ижодини адабий танқидчи, адабиётшунос олим сифатидаги фаолияти билан бирга давом эттиради. Ўзбекистон ССР Фанлар академияси ташкил этилиши билан (1943 й.) Ойбек ёзувчи ва олим сифатида биринчилардан бўлиб, республика академиясининг ҳақиқий аъзоси қилиб сайланади. Ойбек шу йилдан то 1952 йилгача ЎзССР Фанлар академияси Президиумининг аъзоси ва ижтимоий фанлар бўйича академик-секретарь вазифасини бажаради. 1945 йилдан 1950 йилга қадар Ўзбекистон совет ёзувчилари союзи Президиумининг раиси ва СССР Ёзувчилар союзининг секретарларидан бири бўлиб ишлади.

Йирик жамоат арбоби Ойбек 2, 5, 6-чақириқ СССР Олий Советининг, 3, 4, 7-чақириқ ЎзССР Олий Советининг депутати қилиб сайланади.

Ойбек совет адабиётини ривожлантиришдаги, жамоатчилик ва халқ олдидаги улкан хизматлари учун учта Ленин ордени, Меҳнат Қизил Байроқ, иккита «Ҳурмат Белгиси» орденлари, медаллар, ЎзССР ва Қорақалпогистон АССР Олий Советлари Фахрий ёрлиқлари билан мукофотланди, Ўзбекистон халқ ёзувчиси, СССР Давлат мукофоти («Навоий» романи учун), Ҳамза Ҳакимзода номидаги республика давлат мукофоти («Болалик» повести учун) лауреати унвонларига сазовор бўлди.

Ойбек асарлари пафоси чуқур халқчиллик ва партиявийлик, илмий-тарихийлик, янги қаҳрамон ва янги ижтимоий-тарихий (социалистик) идеал билан сугорилган эди.

Шунинг учуноқ адид «Халқ ва партия ҳамма вақт менга илҳом ва куч берди ва барча меҳнатим, бутун муҳаббатим умримнинг охиригача халқимни, партиямни дидир» деганда тамсман ҳақли эди.

Ойбек ўзбек совет адабиётини умумсовет, демакки, жаҳон адабиёти босқичига кўттарган ёрқин намояндалардан, ўзига хос талантларидан бири эди. У ўз ижодиёти билан адабиётнинг эстетик воситалари арсеналини ғоят бойитди, ўзбек тили ва сўз санъатининг янги имкониятлари ва уфқларини очди, инсон ва жамиятни бадиий танишнинг новаторлик йўлларини кашф этди. Бунга у замондошларимизнинг ташвиш ва интилишларини, орзу ва курашларини чуқур тушуниш ва юракдан ҳис қилиш орқали эришди. Унинг шеър, поэма, очерк, ҳикоя, қисса ва романлари, публицистик, танқидий, илмий мақолалари ва тадқиқотлари китобхонлар онгидা, қалбида, зеҳни ва психологиясида актив акс-садо қўзғотади, ҳаётга, нурли истиқболни яратишга чорлайди.

Бевақт ўлим устоз адаби 63 ёшида (1905—1968) орамиздан олиб кетди. Аммо у халқ юрагида яшамоқда. Унинг энг яхши асарлари қайта-қайта босилди, улуғ рус ва қардош халқлар тилларига таржима қилинди, немис, инглиз, француз, чех, словак ва ҳоказо тилларда ҳам жарангламоқда. Ойбекнинг ўн томлик асарлар тўплами Fa-fur Fулом номидаги Адабиёт ва санъат нашриёти томонидан нашр этилиб, ўқувчиларига етказилди. Улуғ адабининг номи партия ва ҳукуматимиз томонидан бошқа кўп тадбирлар билан ҳам адабийлаштирилди.
